

# Diálogos

Faculdade de Filosofia e Ciências Humanas  
Universidade Nacional Timor Lorosa'e

Diálogos

ISSN em linha 2789-2182

ISSN impresso 2520-5927

dialogosuntl.com

<https://doi.org/10.53930/27892182.dialogos.2.104>

Volume 02

2017

## VALÓR, PODÉR NO ASAUN SOSIÁL: RELASAUN ENTRE SOSIEDADE, KULTURA NO TRANSMISAUN KOÑESIMENTU TUIR MAX WEBER

## VALUE, POWER AND SOCIAL ACTION: RELATIONS BETWEEN SOCIETY, CULTURE AND KNOWLEDGE TRANSMISSION IN MAX WEBER

Alessandro Boarcaech

Professor Convidado da Universidade Nacional Timor Lorosa'e

Submetido: 24 de abril de 2017

Aceito: 26 de julho de 2017

Publicado: 17 de novembro de 2017

# VALÓR, PODÉR NO ASAUN SOSIÁL: RELASAUN ENTRE SOSIEDADE, KULTURA NO TRANSMISAUN KOÑESIMENTU TUIR MAX WEBER

Alessandro Boarcaech<sup>1</sup>

**Rezumu:** Max Weber nu'udar pensadór – ema hanoin-na'in – prinsipál ida entre hirak seluk iha finál sékulu XIX no iha inísiu sékulu XX. Ninia obra fô influénsia ba área oioin, hanesan filozofia, psikolojia, sosiolojia, antropolojia, istória no siénsia polítika. Entre konseitu hirak-ne'ebé Max Weber dezenvolve ona mak hanesan konseitu sira kona-ba asaun sosiál, valór, tipo-ideal, sistema dominasaun, *desencantamento do mundo* no *racionalização da sociedade*. Ideia sira Max Weber nian importante tebes, tanba ajuda ita atu hanoin kona-ba relasaun entre sosiedade, kultura no forma oinsá ema sira aprende atu relasiona ba malu iha comunidade nia laran.

**Liafuan-xave:** Max Weber; valór; asaun sosial; *desencantamento do mundo*; *racionalização da sociedade*.

## VALUE, POWER AND SOCIAL ACTION: RELATIONS BETWEEN SOCIETY, CULTURE AND KNOWLEDGE TRANSMISSION IN MAX WEBER

**Abstract:** Max Weber is one of the most important thinkers of the late nineteenth and early twentieth century. His work has influenced several areas, such as philosophy, psychology, sociology, anthropology, history and political sciences. Among the concepts developed by Max Weber are those of social action, value, ideal-type, systems of domination, disenchantment of the world, and rationalization of society. Max Weber's ideas are important because they help us to think about the relationship between society, culture and the way people learn to interact in community.

**Keywords:** Max Weber, value; social action; disenchantment of the world; rationalization of society.

---

<sup>1</sup> Profesor iha Universidade Nacional Timor Lorosa'e (UNTL).  
<https://doi.org/10.53930/27892182.dialogos.2.104>

## KONTESTU ISTÓRIA NIAN

Max Weber nu'udar pensadór prinsipál ida entre hirak seluk iha finál sékulu XIX no inísiu sékulu XX. Nia moris iha Alemaña, iha Erfurt iha lon-ron-21, fulan-abril, tinan-1864. Ninia obra fó influénsia ba área oioin, hanesan filozofia, sosiolojia, direitu, antropolojia, istória, ekonomia no siénsia sira kona-ba relijiaun no polítika. Weber la fiar ba verdade universal no verdade ne'ebé la muda. Ba autór ida-ne'e kontestu istória no individuun nian fó influénsia no hetan influénsia hosi sociedade. Atu hatudu impor- tância ba ita hodi kompriende prosesu sira istória nian no motivasaun ema sira-nian hodi hala'o asaun ida, ninia teoria mós ema koñese hanesan *sociologia comprensiva*.

Weber rasik simu influénsia hosi akontesimentu sira istória nian ne'ebé mosu iha ninia época. Hosi akontesimentu sira-ne'e hamosu ideia evolucionista sira ne'ebé propoin hosi Charles Darwin no Alfred Russel Wallace. Darwin no Wallace, iha segunda metade sékulu XIX nian, dezenvolve ketak-ketak ideia katak espésie sira adapta-an ho ambiente no ho ida-ne'e garante sira-nia moris-tuir ba sira-nia jersaun futuru nian. Adaptasaun ida-ne'e enjerál envolve mudansa ba isin-lolon ne'ebé halo espésie adapta liután atu moris-tuir iha kontestu ruma nia laran. To'o momentu ne'ebá, ideia kriasionista dehan katak Maromak, ka forsa sobrenatural hirak seluk, mak halo ema, no ideia ne'e kuda-metin iha imajinasaun ema tomak nian no akademia nian. Maibé, evolucionizmu propoin tiha katak espésie atual sira, liuliu Ema, nu'udar adaptasaun no mudansa hosi espésie hirak-ne'ebé uluk eziste ona. Evolucionizmu sai hanesan fali hun ba lójika ne'ebé uza hosi área oioin koñesimentu nian. Weber konkorda ho importância hosi konseitu evolucionista sira, maibé hanoin katak konseitu sira-ne'e la sai adequadu ba análise kultura no ba siénsia sosiál. Tuir Weber, estudu sosiál no kultura envolve kompriensaun subjetividade no ida-ne'e la bele esplika de'it ho haree ba adaptasaun ba ambiente.

Revolusaun indústrua, ne'ebé hahú iha sékulu XVIII no dura to'o segunda metade sékulu XIX nian, sai nu'udar eventu seluk ida-ne'ebé fó influénsia ba pen- samentu Max Weber nian. Ho mamosuk indústrua sira, produsaun ba artesanál halo fali ho mákina. Iha período ida-ne'e deskobre tiha besi-asu, enerjia elétrika, uza karvaun no petrólei, ne'ebé hamosu mudansa iha relasaun

sira servisu nian, sidade sira harii, ema bele halo viajen ho lalais hosi fatin ida ba fatin seluk, harii tiha burgezia ekonomia nian no sistema kapitalizta hahú manán ninia forsa.

Kapitalizmu, hamutuk ho revolusaun indústría, altera tiha relasaun sira podér nian. Merkadu-livre bazeia tiha ba kompetisaun entre emprefáriu privadu sira-ne'ebé kontrola produsaun no distribuisaun ba soin sira konsumu nian, ne'ebé kontribui ba hamonu sistema monarkia no aristokrasia ne'ebé kontrola governu no polítika país sira-nian. Fó mós influénsia ba halakon eskravatura, ho nune'e ema-atan sira sai fali traballadór livre no ema-konsumidór ba pro- dutu hirak-ne'ebé mosu liuhosi industrializasaun. Foku ba lukru nian favorese tiha la iha ekilíbriu iha relasaun entre patraun ho ema-empregadu. Traballadór sira, iha hahú kapitalizmu nian, servisu iha oras barak nian laran no manán saláriu ida-ne'ebé ki'ik loos. Sidade sira simu ema hosi fatin hotu-hotu ne'ebé buka servisu iha fábrica sira. Ho tempu ne'ebé la'o hamosu ema barak mak la iha servisu no ki'ak.

Alemaña, Weber nia paíz moris-fatin, unífika no sai Estadu iha tinan 1871. Impériu Alemaun, ne'ebé koñese ho naran ida-ne'e, la'o liu mudansa administrativa oioin, tensaun diplomátika ho nasaun hirak seluk, revolta iha rai-laran, ne'ebé hahú tiha prosesu industrializasaun nian no hamosu nasionalizmu ne'ebé ikus mai hamoris nazismu ne'ebé kauza Funu Mundiál da-II. Nune'e, Max Weber marka prezensa iha momentu Estadu Alemaun moris no kresimentu nasionalizmu radikál. Ba Weber, nasionalizmu ida-ne'e mak kombate diferença ideia no transforma ema ida (ema-estranjeiru, ema ne'ebé ho opiniaun no fiar diferente) ba fali inimigu, ne'ebé representa risku ida ba diversidade kultura no desenvolvimentu ne'ebé hanesan iha sociedade.

Aspetu seluk istória nian ne'ebé fó influénsia ba pensamentu Weber nian mak asensaun, hahú hosi sékulo XVI, relijiaun protestante iha Europa<sup>2</sup>. Relijiaun protestante fó folin ba relasaun individual ema nian ho Maromak, prosperidade ekonomia nian hanesan sinál fiar relijiaun nian, servisu hanesan virtude no vokasaun, vida ida laho esesu, fiar rasionál no partisipasaun ativa iha sociedade. Ba Weber, forma hanoin protestante sira-nian ida-ne'e

<sup>2</sup> Reforma Protestante nu'udar movimentu kristaun nian ne'ebé hahú hosi Martin Lutero iha 1517 ho publikasaun ba Teze 95 (sianulu-resin-lima), ne'ebé reivindika mudansa iha katolisizmu romanu. Entre igreja no grupu sira-ne'ebé Weber estuda ona mak: Luteranu, Calvinista, Pietista, Puritanu no Metodista.

fó influénsia ba avansu sira iha siénsia, dezenvolvimentu ekonomia, estrutura saun ba kapitalizmu no organizasaun ba Estadu europa sira nian liuhosi burokrasia. Hosi sorin seluk, estimula individualizmu no relasaun kompetitiva entre ema sira fó impaktu ba forma oinsá kapitalizmu dezenvolve tiha.

Eventu istória sira-ne'e la'ós de'it fó influénsia ba Alemaña, paíz moris fatin Weber nian, maibé ba sociedade europeia hotu-hotu, liuliu nasaun sira iha Europa norte. Max Weber, alende moris ho impaktu sira hosi akontesimentu sira-ne'e iha ninia sociedade, reflète mós kona-ba saida mak moris la'ó hela. Ita bele dehan katak Weber, iha tempu hanesan hetan influénsia hosi kontestu istória nian, maibé nia mós fó influénsia ba kontestu istória, tanba buka hanoin no análiza kona-ba realidade ne'ebé haleu nia.

## DIÁLOGU NO KONTROVÉRSIA

Durante ninia perkursu intelektuál nian, Weber halo diálogu ho pensadór balu. Pensadór hirak-ne'e, balu la'ós kontemporáneo ho Weber, maibé sira-nia hanoin fó influénsia ba peskiza no análise hosi filózofu no peskizadór sira hosi área siénsia naturál no sosiál.

Immanuel Kant (1724-1804) iha livru *Crítica da Razão Pura* kestiona katak bele ka lae razaun pura ida haketak hosi esperiénsia. Tuir Kant, koñesimentu nu'udar representasaun ida no la'ós buat ne'ebé prodús fali realidade. Max Weber iha opiniaun hanesan kona-ba koñesimentu nu'udar vizaun parte ida de'it no la kompletu hosi realidade. Maibé, diverjénsia entre Weber no Kant hamosu iha área kona-ba valór nian. Ba Kant étika mak deontolójiku, ka, valór morál hosi asaun ida bazeia de'it ba kumprimentu devér ida nian. Étika ba devér ne'e sai universál, rasionál no formál ida-ne'ebé halo ema, kontestu istória no konsekuénsia sira asaun ida nian la sai importante atu ita atribui valór asaun nian. Se ita kumpri regra tanba ta'uk kastigu, ka tanba ita manán buat balu, asaun ida-ne'e lakón ninia valór morál. Ho liafuan seluk, se regra sira dehan la bele oho ó, entaun ha'u sei la oho. Maibé se ha'u halo-tuir regra tanba ta'uk kastigu, ida-ne'e hamenus valór morál nian. Ho forma hanesan se ha'u la halo-tuir regra hodi la oho. Karik hau oho ema tamba ha'u koko atu salva ema seluk nia moris, ida-ne'e mós hamenus valór

morál asaun nian. Ba Kant eziste imperativo categórico ida, ka, ita tenke kumpri regra sira ho dalan haktuir razaun no la kestiona. Ne'e mak garante valór morál asaun nian. Interese úniku ne'ebé bele aseita ba asaun morál nian mak kumprimetu ba devér liuhosi devér. Devér nu'udar finalidade no nunka nu'udar meu atu atinji buat ruma. Max Weber la konkorda ho Kant bainhira konsidera valór hanesan buat subjétivu ida, ne'ebé hola-parte iha kontestu istória nian, ne'ebé tenke konsidera hanesan maneira ema nian atu hatene mundu no konsekuénsia sira asaun nian.

Ba Friedrich Nietzsche (1844-1900), la posível atu defini motivasaun universál no regra jerál sira atu ita defini ema nia asaun sira. Iha motivu barak, mak subjétivu ka rasionál, ne'ebé bele muda hosi ema ida ba ema seluk, hosi époka ida ba époka seluk, hosi fatin ida ba fatin seluk. La bele avalia asaun sira bazeia ba *kauza no efeitu*. Pontu seluk Nietzsche nian – ne'ebé hetan influénsia hosi Kant – maka koñesimentu nunka korresponde ba realidade tomak. Ba nia, koñesimentu sempre nu'udar subjétivu, pontu-de-vista ida hosi pontu-de-vista diferente sira no la reprezenta realidade. Tuir Nietzsche, iha ninia livru *Assim Falou Zaratustra (Nune'e Zaratustra ko'alia tiha)*, sosiedade sira ohin-loron moris hela iha períodu pesimista nian no la iha esperansa ne'ebé Ema *lakon sentidu*. Atu ema koko moris iha realidade *niilista* – katak falta valór, sentidu ka utilidade ezisténsia nian – Ema la ba pensamentu rasionál, progresu materiál no ba relasaun sira-ne'ebé bazeia ba lei. Max Weber iha hanoin diferente oituan, tanba ba nia, ita bele avalia asaun sira bazeia ba intensaun an rasik, subjétiva no konsekuénsia sira asaun nian. Pesimizmu Nietzsche nian relasiona ho sosiedade nia dezenvolvimentu fó influénsia ba Weber atu hamoris konseitu kona-ba *desencantamento do mundo*. Maibé, Weber mantein valór sira, ho afirma katak, maske valór nu'udar subjétivu, ita bele kompriende liuhosi pontu-de-vista pesoál nian.

Heinrich Rickert (1863-1936) kritika tiha pozitivismu bainhira afirma katak métodu no análise siénsia naturál nian la bele hanesan ho siénsia sosiál, istória no kultura nian. Iha ninia époka, maioria peskizadór no filózofu sira hanoin katak métodu sira siénsia naturál nian tenke utiliza hanesan modelu ba siénsia hotu-hotu hirak seluk. Maibé, Rickert iha ninia livru *Ciência Cultural e Ciência Natural* kontesta hanoin sientífiku iha époka ne'e nian

bainhira afirma katak siénsia kulturál tenke konsidera valór no fatór subjétivu hirak-ne'ebé fó influénsia ba forma hodi ema pratika asaun. Ba autór ida-ne'e, realidade sosiál bele la iha rohan no buat hotu-hotu no kualkér tentativa atu kompriende realidade sosiál bele sai imposível. Saida mak ita bele observa mak manifestasaun sira realidade ida-ne'e nian no nunca ninia totalidade. Maibé, maske asaun sosiál sira la hanesan, valór sira ne'ebé fó influénsia ba asaun sira nu'udar universál no tenke konsidera. Weber, nu'udar alunu Rickert nian, konkorda katak asaun sosiál iha multiplisidade. Maibé la konkorda ho universalidade valór sira-nian. Ba Weber, valór no tipu sira asaun nian, la'ós universál no tenke kompriende tuir sira-nia kontestu istória no sosiál.

Ba Karl Marx (1818-1883), fenómenu sosiál mosu tanba luta klase entre grupu sosiál rua, ka, proprietáriu no proletáriu. Grupu sira-ne'e hadau malu kona-ba kontrolu ba meu sira produsaun materiál ba sociedade. Iha ninia livru *O Capital*, Marx afirma katak relasaun ekonómika no konflitu klase sira-nian mak nu'udar kauza sira ba problema no mudansa sosiál, tanba hosi produsaun materiál ba soim mak bele estrutura sociedade. *Materialismo Histórico* ne'ebé propoin hosi Marx afirma katak esplorasau ba servisu no la iha igualdade iha ekonomia sai nu'udar buat ida-ne'ebé mak hala'okontesimentu istóriku sira. Weber konkorda ho Marx katak indivíduu iha importánsia ba mudansa sosiál sira, maibé la konkorda ho konflitu sira iha sociedade maihosi de'it luta klase entre patraun ho ema-empregadu tanba hadau malu meu sira ba prodús no fahe soim sira. Ba Max Weber, relasaun sosiál kompleksu tebes no iha fatór barak mak kontribui ba konflitu sosiál ne'e no ba dezvoltamentu sociedade nian. Se Karl Marx bazeia tiha ninia teoria ba konflitu klase sira-nian, Weber koko tiha atu hatudu katak konflitu ne'e mak konflitu ideia nian<sup>3</sup>.

---

<sup>3</sup> Autór sira hirak ne'ebé ko'alia ona mak fó influénsia diretamente ba Weber. Max Weber rasik rekoñese importánsia hanoin-na'in sira-ne'e nian ba ninia teoria. Maibé, Max Weber mós dadalia ho autór hirak seluk, hanesan Wilhelm Dilthey. Ba Dilthey, iha livru *Sistema da Ética*, razaun sentífika la boot liu razaun istória nian. Razaun istória ida-ne'e iha sentidu ne'ebé la'ós universál, maibé kontestualiza iha tempu no iha relasaun ho vizaun mundu nian no pontu- de-vista spesífiku. Nune'e, sentidu sasán sira-nian tenke kompriende tuir sira-nia kontestu istória. Dilthey ho ninia ideia konaba sentidu halo opozisaun kontra hanoin pozitivistá nian.

## VALÓR, ASAUN, PODÉR NO SOSIEDADE

Entre ideia sira-ne'ebé Max Weber dezenvolve ona, iha nosaun kona-ba *valór*. Tuir hanoin Weber nian (1995), *valór* nu'udar ideia, konseitu no serteza lubun ida ne'ebé eziste iha grupu sosiál ruma. Valór sira-ne'e sei kontestualiza iha tempu no tau ba prátika. Valór sira fô influénsia ba forma oinsá ema relaciona ho an rasik, ho ema seluk no ho sosiedade tomák. Ita hotu moris iha valór lubun ida nia laran ne'ebé ita adopta hanesan ita-nian, maibé sira hola-parte iha konstestu istóriku sosiál ida nian. Valór sira-ne'e bele muda hosi fatin ida ba ida seluk no hosi époka ida ba époka ida seluk. Sá mak valór ohin-loron nian la'ós ida-ne'ebé ba ita-nia bei-ala sira ka bele la ba ita-nia oan sira. Époka ida-idak iha ninia valór rasik ne'ebé muda tuir tempu.

Ne'e dehan katak konseitu *valór* nian ne'ebé propoin hosi Weber diferente hosi tradisaun filozófika iha ninia époka ne'ebé bazeia ba Immanuel Kant. La iha valór universál, esensíal no la muda, la iha regra jerál ne'ebé determina valór, la iha asaun ne'ebé asosia tiha ho valór spesífiku ida uluk. *Valór* la'ós norma, maibé nu'udar buat subjektivu ne'ebé bele muda hosi situaasaun ida ba ida seluk. Valór sira, maske la bele demonstra, bele hatene. Iha tentativa atu organiza siénsia sosiál ida-ne'ebé bazeia ba faktu sira, Weber (1995) propoin ideia kona-ba *neutralidade axiológica*. Ne'e dehan katak peskizadór sira la bele atribui juízo-valór ba asaun ruma, maibé ho kontráriu, valór sei defini liuhosi asaun.

Weber, kontráriu ho pensadór no sientista barak hosi ninia époka, la fiar katak iha lei jerál ida mak esplika kona-ba dinámika sosiál hotu-hotu ne'ebé diferente. Ba Weber, ita tenke hatene fenomenu sosiál sira hahú hosi sujeitu ne'ebé fô sentidu ba asaun. Nune'e, Weber formula tiha konseitu kona-ba *tipo-ideal*. *Tipo-ideal* sira la eziste ho forma konkreta, maibé nu'udar rekursu analítiku nian atu ita hatene fonómenu sosiál sira (Weber, 1982). *Tipo-ideal* la representa realidade, maibé nu'udar modelu ida ka instrumentu metodolójiku ida. Kompleksidade realidade nian sei hamenus bainhira ita define aspetu balu atu halo estudu. Bainhira kompara aspetu hirak-ne'e ho realidade seluk, ita bele haree-hetan parte ne'ebé hanesan no la hanesan no alkansa ninia kauza no finalidade hosi asaun ida. Nune'e, Weber dehan katak ideia sira kona-ba kristianizmu, polítika, liberalizmu no tipu ideia hirak seluk, nu'udar tendénsia



hodi hamenus maneira barak oinsá ema relaciona ba malu no kompriende konseitu sira-ne'e. Maibé bainhira ita observa oinsá ema ida-idak no grupu sosiál kompriende kona-ba *tipo-ideal*, ita bele kompriende oituan sira-nia diferença forma manifestasaun nian.

Atu sai objetiva analiza ba faktu konkretu no observavel, Weber elabora tiha konseitu kona-ba *ação social*, ne'ebé tuir nia tenke sai nu'udar objetivu estudu sosiolojia nian. *Ação social* mak asaun hotu-hotu ka kualkér asaun ne'ebé iha objetivu espesífiku, ne'ebé ho oin ruma interfere iha relasaun ho asaun ida seluk, ne'ebé realiza iha kontestu sosiál no bele altera konforme situasaun sira (Weber, 1982). Tuir Weber iha de'it *ação social* bainhira ema halo komunikasaun ho ema seluk liuhosi asaun. Ho nune'e, *ação social* ema ida nian maihosi ideia katak ninia hahalok sei halo reasaun hosi ema seluk.

Weber propoin *ação social* tipu haat (4). Ida-ne'e tanba sosiolojia kompriensiva Weber nian haree katak bainhira ita muda individu, sociedade, ka tempu, tipu asaun seluk sei bele ezisti. Forma sira *ação social* nian ne'ebé Weber propoin mak: asaun rasionál ne'ebé relaciona ho finalidade, asaun rasionál ne'ebé relaciona ho valór, asaun afetiva no asaun tradisionál. Maibé, atu ita defini *ação social*, presiza atu ita kompriende motivasaun sira ema nian hodi realiza asaun ida-ne'e. Ne'e tanba motivasaun ema ida nian bainhira realiza asaun mak determina tipu *ação social*.

*Ação racional ne'ebé relaciona ho finalidade* mak asaun konkreta, iha objetivu espesífiku. Ema iha objetivu espesífiku no forma rasionál hodi buka dalan atu hetan saida mak hakarak. Ezemplu ida asaun instrumentál mak asaun marseneiru nian hodi halo ro-ahi. Ro-ahi hanesan meu transporte ida ho finalidade rasik. Marseneiru halo ro-ahi atu manán osan, atu ro-ahi ne'e bele la'o iha tasi leten, hodi lori ema, sasán no buat hirak seluk. Finalidade asaun nian tenke loloos no espesífika.

*Ação racional ne'ebé relaciona ho valór* mak asaun ne'ebé bazeia ba valór pesoál sira. Valór pesoál sira-ne'e mak hirak-ne'ebé ema fiar no fó influénsia ba ema nia forma atu desidi no pratika asaun iha sociedade. Ezemplu ida mak kapitaun ro-ahi nian ne'ebé fiar katak nia mak responsável ba pasajeiru hotu-hotu. Bainhira akontese asidente ruma, kapitaun mak sei preokupa uluk hodi garante katak pasajeiru hotu-hotu hetan salvasaun. Ka ho kontráriu, kapitaun

ro-ahi nian bele koko atu salva uluk nia an no la preokupa ho pasajeiru hirak seluk, tanba fiar katak ninia moris mak importante liu.

*Ação social afetiva* bazeia ba emosaun no sentimentu. Ema sira ne'ebé pratika asaun, dala barak, ho forma impulsu no ho kedas asaun afetiva en- volve komportamentu hirak-ne'ebé kauza hosi siume, ódiu, domin, tristi, haksolok, ta'uk no hirak seluk. Dala balu la haree konsekuénsia sira, porezemplu, hanesan ita hakanek ema ne'ebé ita gosta.

*Ação social hosi tipu tradisionál* bazeia ba toman, kostume no tradisaun. Ema halo buat ne'ebé nia aprende tiha atu halo haktuir regra no kostume tradisionál. Ezemplu ida mak joven sira sei nonook bainhira iha katuas-ferik nia oin, tanba sira aprende katak tenke respeita katuas-ferik. Ka ema umilde, ka ema sira-ne'ebé la okupa kargu xefia nian, sei nonook iha ema-riku nia oin ka ema ne'ebé ho podér, tanba sira aprende katak ema tenke nonook iha ema superiór nia oin.

Ba Weber, ita la bele desidi *ação social* ida ne'ebé di'ak no aat, loos ka sala liuhosi ita-nia julgamentu morál. Ita presiza hatene kontestu ne'ebé akontese tiha no ema ne'ebé pratika tiha ninia motivaun no valór. Alende ida-ne'e, asaun ida de'it bele iha tipu oioin. Porezemplu, marseneiru halo ro-ahi atu manán osan (asaun ne'ebé relasiona ho finalidade), maibé mós atu ajuda ema sira ne'ebé labele atravesa tasi (asaun ne'ebé relasiona ho valór) no tanba ida-ne'e hanesan profisaun família nia no ninia aman hanorin nia (asaun tradisionál). Ita bele hatene katak *ação social* bele defini de'it hahú hosi análize ba valór no motivu hosi ema ne'ebé pratika tiha, nune'e hanesan asaun únika ida ne'ebé bele iha tipu oioin conforme motivaun hosi ema ne'ebé halo.

Kona-ba relasaun sira podér nian, Weber (2009) formula tiha tipu 3 dominasaun nian ne'ebé ema submete hela ba. Dominasaun akontese tanba ema sira hakruuk ba regra hirak-ne'ebé impoin. Submisaun ida-ne'e hala'o liuhosi dalan rua. Bele tanba ema ta'uk ba kastigu no submete de'it maske la konkorda. Dalan seluk mak ema submete tanba moris ona iha sosiedade ida ho valór ruma no fiar katak valór ne'e sai mós ninian. Ema aseita regra tanba la kompriende katak regra sira sosiedade mak impoin, maibé hanoin katak regra hirak-ne'e hanesan buat ida-ne'ebé hola-parte iha sira-nia an rasik.

*Dominação do tipo carismático* mosu bainhira ema husik nia an atu hetan domíniu hosi ema ne'ebé iha karisma, don spesiál no qualidade hirak ne'ebé

ema hotu-hotu admira. Kualidade sira-ne'e bele hanesan erói, santu, beleza, talentu ba múzika, ba desportu no hirak seluk tan. Ita bele haree katak bainhira ema tuir polítiku demagogu<sup>4</sup>, profeta no mensajeiru relijiaun nian, erói sira funu nian. Ida-ne'e mós mosu bainhira ema sira ho emosaun tuir atór, kantór no desportista sira. Ema tuir líder ida-ne'e la'ós tanba nia iha direitu legál ka tanba tradisaun hodi okupa pozisaun ida-ne'ebá, maibé tanba nia iha talentu ruma. Líder ida-ne'e mantein ninia dominasaun bainhira mantein ninia karisma, tanba bainhira lakon karisma sei mós hasai ninia poder.

Iha mós *dominação do tipo tradicional*. Dominasaun ida-ne'e mosu bainhira ema sira husik sira-nia an atu hetan dominasaun hosi ema ruma ne'ebé fiar katak sai representante hosi regra no kostume sira bei-ala nian no tradisaun nian. Iha tipu dominasaun ida-ne'e eziste xefi no ema sira ne'ebé obedese. Xefi sira, iha dominasaun tradisionál, dala barak hili hosi representante sira poder nian laho partisipasaun povu nian. Relasaun sira tuir dalan ierarkia no poder hotu-hotu konsentra iha xefe nia liman.

*Dominação racional*, ka *racional-legal* bazeia ba lei no norma hirak-ne'ebé sosiedade impoin. Poder ne'e ka'er hosi líder ida-ne'ebé simu autoridade atu lidera bazeia ba regra hirak-ne'ebé hatuur iha estatutu ka lei sira. Regra hirak-ne'e bele muda bainhira de'it kumpri prosedimentu legál nesésariu sira. Burokrasia nu'udar ezemplu ida dominasaun rasionál nian, tanba nia determina sé, iha sirkunstánsia saida no ba tempu hirak mak ita tenke obedese. Nomeia no hili líder sira atu ka'er ukun ba período ruma nia laran, hafoin período ne'e, ema seluk asume fali pozisaun ne'e. Hanesan ezemplu, xefi suku, xefi aldeia no hirak seluk ne'ebé hola-parte iha tipu dominasaun ida-ne'e, tanba hili sira no sira-nia poder determina ona iha lei ida-ne'ebé regula sira-nia asaun. Ezemplu seluk mak empreza no asosiasaun sira-ne'ebé iha regra lubun ida-ne'ebé orienta kona-ba hili sira-nia kordenadór.

Regra, valór no asaun sosiál lubun ida mak kontribui ba orden sosiál. Tuir Weber orden sosiál sai nu'udar objetivu sosiedade nian. Regra hirak-ne'ebé estabese ona unifika forma oinsá ema hanoin no pratika asaun, ne'ebé halo sosiedade sai organizada liutan ba ema hotu-hotu. Banati ba regra, prátika, kostume no símbolu sira kauza sensasaun ba unidade no orden sosiál.

---

<sup>4</sup> Polítika ne'ebé uza liafuan sira povu hakarak rona hodi manipula interese povu nian, liuhosi diskursu.

Konseitu kona-ba *desencantamento do mundo* signifika katak prosesu istó-riku ne'ebé hasai majia hosi mundu. Ba Weber (1982; 2004) *desencantamento* nu'udar prosesu istóriku ne'ebé hahú ho profeta judaika sira no ho hanoin sientífiku eléniku nian<sup>5</sup>. Hahú hosi ne'ebá, relasaun ho mundu muda hosi grau ba grau to'o sai rasonál, prátika no regra mak regula. Mosu tiha separasaun entre ema no natureza. Mundu deus sira-nian, mundu mitu no mundu sagradu troka tiha hosi hanoin ne'ebé bazei ba razaun, téknika no siénsia.

Ho objetivu atu esprika di'ak liu ninia ideia konaba *desencantamento*, Weber propoin tipu rua: *desencantamento religioso* no *desencantamento científico*. *Desencantamento religioso* mosu bainhira iha relasaun entre ema ho *sobrenatural* ne'ebé halo de'it liuhosi regra, rituál no obrigasaun lubun ida. Ema la presiza tan intermediáriu, tanba relasaun ho Maromak bele halo diretamente. Salvasaun sei mosu bainhira obedese ba étika hahalok nian. Maromak nia bensaun sira sei fó ba ema ne'ebé halo-tuir Ninia orden no la liuhosi oferta no sakrifísiu sira. *Desencantamento religioso* fó sentidu ba mundu liuhosi halo halibur-hamutuk buat hotu-hotu hodi sai de'it Maromak-étiku no ezijente ida. La iha tan Maromak oioin no forsa naturál oioin, ida-ne'e troka tiha hosi Maromak ida de'it ne'ebé kontrola buat hotu-hotu. Liga ho ida-ne'e, iha *desencantamento científico* ne'ebé uza fali razaun, método no téknika atu esprika mundu liuhosi káلكulu ne'ebé esprika relasaun sira entre kauza no efeitu.

Prosesu hotu ne'e kontribui ba *racionalização da sociedade* (Weber, 2014). Bainhira funsionamentu sosiedade nian kompleksu liután sei hadook dominasaun tradisionál no dominasaun karismátika no sei hakbesik ba dominasaun rasonál. Atu dominasaun rasonál funsiona presiza norma no regra lubun ida-ne'ebé organiza sosiedade iha relasaun impesoál, legál no rasonál. Aspetu hotu-hotu moris sosiál nian (estuda, kuda, téknika servisu

<sup>5</sup> Tuir Weber, profeta judeu sira hosi livru Bíblia antigu testamentu sai hanesan abut ba *desencantamento religioso* bainhira sira hasoru relijiaun sira-seluk no nega ezisténsia maromak sira seluk. Durante Períodu Eléniku, ne'ebé hala'o hosi tinan 323 a.C. to'o 146 a.C., Grécia aumenta nia território no nia influénsia kultural mós sa'e maka'as, hodi nune'e fó influénsia ba dezenvolvimentu siénsia. Weber hanoin katak período ida ne'e importante tebes ba dezenvolve ita nia siénsia ne'ebé ohin loron ita iha, no ba prosesu *desencantamento científico*.

nian, fiar ba Maromak, polítika, ekonomia, no nst.) sei rasionaliza. Halo *racionalização* ba sosiedade troka obediénsia ba kostume liuhosi adapta, tuir planu, sirkunstánsia no interese pesoál lubun ida.

Tuir Max Weber ema aprende valór ruma no pratika. Maibé, valór hirak-ne'e bele muda hosi fatin ida ba fatin seluk, hosi tempu ida ba tempu seluk no hosi ema ida ba ema seluk. Bele determina valór sira liuhosi análise ba kazu ida-idak. Maibé iha sosiedade moderna la'o hela prosesu *racionalização* ne'ebé halo relasaun sira sai téknika, objetiva no rasionál liután.

Buat hotu ne'e afeta ba kultura rasik bainhira hanesan fenómenu sosiál. Ba Weber (2006) kultura sai nu'udar buat ida-ne'ebé dinámiku, kompleksu no envolve disputa oioin kona-ba forsa hirak-ne'ebé kontestualiza ona iha istória. Kultura nu'udar sistema símbulu, signifíkadu, testu no prátika oioin ne'ebé, iha tempu hanesan, reprezenta mundu liuhosi pontu-de-vista ema nian, ne'ebé fó influénsia mós ba ema atu adopta konseitu kultura nian ne'ebé vigora hela. Ho nune'e, ba Weber kultura la relasiona ho prátika no fiar tradisionál sira, maibé hakseluk malu entre grupu oioin ne'ebé forma sosiedade hodi koko lejítima sira-nia hanoin ba grupu hirak seluk.

Bainhira ita ko'alia kona-ba kultura no sosiedade, ita labele sees atu ko'alia kona-ba edukasaun, prosesu aprende no fahe koñesimentu. Ba Weber, edukasaun ohin-loron nian tuir hela programa ida-ne'ebé prioritiza segmen-tasaun no espesializasaun. Ema sira hetan treinu atu sai espesialista iha área ruma. Área ida-idak sabér nian nu'udar independente no la iha relasaun ho ida seluk. Edukasaun umanística, ne'ebé halo alunu sira aprende dixiplina oioin, komesa lakon ninia fatin. Alunu sira hetan treinu ba asuntu ida ne'ebé espesífiku. Tuir Weber (1982) elite sira ekonomia no polítika nian iha liu asesu ba informasaun no ba edukasaun ida ho qualidade. Dezigualdade iha ekonomia no foku ba espesializasaun ajuda elite sira atu mantein nafatin iha podér, tanba sira iha edukasaun ho qualidade ne'ebé di'ak liu.

Weber komenta katak dala barak profesór sira hili konteúdu tuir saida mak sira gosta liu no taka informasaun ba alunu sira. Transmisaun ba koñe-simentu halo tuir ierarkia ne'ebé iha leten iha profesór ne'ebé mak konsentra koñesimentu no iha okos iha alunu sira ne'ebé presiza aprende. Profesór sira

bainhira kontrola informasaun prodús fali sistema kona-ba dominasaun no eskluzaun. Ho nune'e, eskola ne'ebé tenke kumpri ninia funsaun atu estimula análise no pensamentu livre maibé hamosu fali difikuldade iha transmisaun matenek no reforsa fali dezigualdade iha sociedade.

Bainhira analiza métodu sira ba aprendizajen no transmisaun matenek, valór sira profesór no alunu nian, kondisaun sala-de-aula, qualidade forma-saun, identifika difikuldade alunu sira-nian bainhira aprende no difikul- dade profesór nian bainhira hanorin, sá mak signifkadu estuda, arti matenek no hirak seluk, sai nu'udar maneira atu kompriende ita-nia sociedade. Bainhira ita halo ida-ne'e, ita bele prátika asaun no harahun sistema eskluzaun sosiál no kualifika prosesu hanorin-aprende.

## REFERÉNSIA

- Weber, M. (1982). *Ensaio de Sociologia*. 5 ed. Rio de Janeiro: Editora LTC.
- Weber, M. (1995). O sentido da neutralidade axiológica nas ciências sociais e econômicas. In: M. Weber. *Metodologia das Ciências Sociais*. Campinas: Editora da Universidade Federal de Campinas.
- Weber, M. (2004). *A ética protestante e o espírito do capitalismo*. São Paulo: Companhia das Letras.
- Weber, M. (2006). *A "objetividade" do conhecimento das ciências sociais*. São Paulo: Ática.
- Weber, M. (2009). *Economia e sociedade: fundamentos da sociologia compreensiva*. 4 ed. Brasília: Editora da Universidade de Brasília.

Direitos Autorais (c) 2017 Alessandro Boarccaech



Este texto está protegido por uma licença [Creative Commons](#)

Você tem o direito de Compartilhar - copiar e redistribuir o material em qualquer suporte ou formato - e Adaptar o documento - remixar, transformar, e criar a partir do material - para qualquer fim, mesmo que comercial, desde que cumpra a condição de:

Atribuição: Você deve atribuir o devido crédito, fornecer um link para a licença, e indicar se foram feitas alterações. Você pode fazê-lo de qualquer forma razoável, mas não de uma forma que sugira que o licenciante o apoia ou aprova o seu uso.

[Resumodalicença](#) [Textocompletodalicença](#)